

Bagozza terzo

Daniele Bagozza, atlet de snowboard de Urtijëi, nes à cuntà de coche la cèla iust ora pra si sajón



Daniele Bagozza ie nce chëst ann dançà ti plazamënc de snowboard.

Fotos miha matavz.b

Daniele Bagozza ie terzo, sibe tla classifica generela che tl slalom. N scialier plu aut permez al ann passà. L atlet de Urtijëi ie cuntënt cun si prestazion ma nia al cënt per cënt. Per i Mundiei uelel mo cialé de tré ora vel' pont.

»Pra l'ultima garejeda me ëssi aspità deplù. L ann passà ulovi bele vëncer la copa, ajache fove prim te classifica. Iló ne àla nia butà. Chëst



I atlec dla medema squadra: Gabriel Messner, che ie ruvà segundo tl slalom, Maurizio Bormolini che à venciù la classifica generela y dl slalom lerch y Daniele Bagozza, che ie ruvà terzo tla generela y tla classifica dl slalom.

ann fovi terzo te classifica cun puec ponc dal prim perchël messovi ataché, l ann passà messovi »mé« defënder la lerch. Minove che la jisse miec ma la ne n'è nia ulù vester. Son tumà ora ti otafs y ruvà nono pra l'ultima garejeda a Winterberg. Nce a mi colegs ne ti àla nia butà y chëi dl'Austria à venciù la copa. Iló se ons bën sambën duc mpue dessenà (*s'la rij, ndr.*). Ala fin àla mpo butà che son ruvà terzo tla classifica dl slalom y te chëla generela dl mond. L ie da dì, che l ann passà fovi cuarto tla classifica y chëst ann terzo. Chël uel dì, che me é mpo miurà; é mefun fat de manco podesc te chësta sajón. Cun l sentiment y l material ne n'èi mo nia abinà l miëur dl miëur, ne son mo nia defin cuntënt. Spere de l abiné sën, ajache l'ena che vën iel i Mundiei y ulësse dé gas iló. Ie fajeré pea pra l slalom, ajache ne é iust nia assé ponc per fé pea pra la garejedes dl slalom lerch.

Coche nazon àla scialdi butà ajache on venciù la Copa dla Nazions. Chëst ann ons na squadra veramënter sterscia. Tan che duc dla squadra à fat de plu podesc. Lauron tla drëta direzion», nscila Bagozza n con' dla situazion atuela.

Julia Lardschneider